

## **La'o Hamutuk**


**Institutu ba Monitor no Analiza Dezenvolvimentu iha Timor-Leste**

Rua dos Martires da Patria, Bebora, Dili, Timor-Leste

Tel: +670 3325013

email: [info@laohamutuk.org](mailto:info@laohamutuk.org)

Website: [www.laohamutuk.org](http://www.laohamutuk.org)



### **Komentáriu husi La'o Hamutuk kona ba relatório peskiza husi Universidade Monash/DFAT, Australia 13 Maiu 2014**

La'o Hamutuk agradese ba peskizadór Brett Inder, Anna Brown no Gaurav Datt ne'ebé fó oportunidade ba ami atu loke diskusaun ho komentáriu badak kona ba sira nia relatório peskiza preliminár ho título "Pobreza no Uma-kain Agrícola iha Timor-Leste".

#### **La'o Hamutuk nia pozisaun**

Kona ba asuntu dezenvolvimentu setór agrikultura, La'o Hamutuk iha vizaun no pozisaun política klaru maibé tanba falta dadus ka estatística ne'ebé objetivu, lolos no kompletu, dala ruma difisil atu defende ami nia ideia sira. Hamutuk ho rede agrikultura sustentável (Hasatil), ami defende konseitu soberania ai-han.

La'o Hamutuk hanoin katak atu lori Timor-Leste ba dalan dezenvolvimentu ne'ebé sustentável, setór agrikultura mak esensiál. Ami promove modelu dezenvolvimentu agrícola sustentável signifika:

- Produsaun organiku, no pratika agrícola sustentável hanesan agroekolojia;
- La presiza fó prioridade ba produtividate maibé haree liu oinsá bele absorbe forsa laboral atu hatún dezemprevu no fornese ambiente servisu di'ak ba produtor kik sira;
- Asegura katak produtor ki'ik sira iha asesu ba fator produsaun sira: rai produtivu, bee, fini lokál, no material báziku seluk;
- Fó prioridade ba diversifikasiun produsaun ai-han atu kontribui ba hadi'ak status malnutrisaun ne'ebé as iha Timor-Leste no diversifika fonte rendimento. Ezemplu hakiak animal ho di'ak ne'e hanesan investimento ida, tanba animal bele hetan susu been, na'an, osan lalais, inklui bele uza animal nia fo'er ba adubu organiku.
- Ajuda produtor ki'ik sira organiza-an molok sira fan sira nia produtu (kooperativa), redus kustu produsaun no halo prosesamentu ba sira nia produtu sira;
- Fó prioridade ba produsaun ba konsumsaun doméstiku atu redus dependénsia ba importasaun no hadi'ak nutrisaun duké fokus ba esportasaun atu hetan osan. La bele esporta produtu ne'ebé seidauk transforma, no iha futuru, esportasaun produtu organiku bele sai hanesan setor ne'ebe stratejiku ka iha potensia boot;
- Fó prioridade ba kualidade duké kuantidade.

## Komentáriu jerál kona ba peskiza preliminár

### 1. Ami haree katak iha peskiza ne'e, merkadu mak hanesan xave atu hatún pobreza.

Ami hanoin di'ak liu completa peskiza ida ne'e ho peskiza sosio-kultural kona ba realidade moris iha Timor-Leste atu comprende produtor no konsumidór nia hahalok duké koko buka ligasaun entre variabel iha modelu econometrics ida no haree merkadu hanesan solusaun ba buat hotu ka fonte ba problema hotu.

Ezemplu, peskiza haree katak parte boot husi produsaun ai-han la fan maibé fahe ba malu ka troka ba malu. Ne'e refleta karakterística importante iha sosiedade Timor-Leste ne'ebé nakonu ho valór solidariedade no partisipasaun moris koletivu ne'ebé forte. Inter-dependénsia entre ema mak kria koezaun sosiál. Merkadu ne'ebé "funciona di'ak", ne'ebé aloka ho efisiénsia rai, forsa laboral no kapitál la bele asegura justisa sosiál.

No mos, despeza balu difisil atu comprende husi perspetiva ekonómiku nian, exemplu serimónia (lia) ka ritual sira. Ema nia hahalok liga ho konsumsaun refleta eransa husi historia, lulik (taboo) ka mentalidade ne'ebé difisil atu esplika ho rasional.

### 2. Peskiza ne'e presiza haree impaktu importasaun ai-han ne'ebé baratu nia implikasaun ba produsaun no konsumsaun ai-han lokál.

Ezemplu peskiza ne'e hatudu katak bainhira rendimentu aumenta uma kain diversifika sira nia hahán no la han sereál de'it (etu no batar) maibé han mos na'an no modo.

Maibé peskiza ne'ebé suporta husi UNICEF (*2013 Survei ba Aihan no Nutrisaun*, ezbosu, seidauk publiko) hatudu katak grupu ne'ebé vulneravel liu tuir Food Consumption Score la konsume hahán báziku de'it (staples) maibé konsume mos modo. Grupu tuir mai iha kategoria "fronteira" (borderline) aumenta ho hahán midar no mina. No grupu iha kategoria ikus aumenta tan ho na'an no ikan. Maioria uma kain ladún han koto no fore-sira, ai-fuan no produtu husi susu been.

### 3. Ami konkorda katak tenke fó prioridade aas liu ba redusaun hahán ne'ebé lakon post kolleita duké hasa'e rendimentu. Evidénsia hatudu katak bele aumenta lalais disponibilidade ai-han se karik problema ne'e resolve ona.

4. Duké fó prioridade ba hasa'e rendimentu, di'ak liu aumenta diversifikasiado ai-han no prosesamento. Nune'e, bele mitiga risku ba produtor sira no aumenta sira nia rendimentu. Ezemplu iha setór kafé, to'os nain sira hetan rendimentu ki'ik tanba maioria fan kafé kulit tasak baratu liu ba kompañia sira, no depois kompañia mak halo prosesamento no hetan lukru boot. No mos, produtor kafé vulneravel liu tanba sira la diversifika sira nia produsaun no tenke sosa sira nia hahán.

### 5. Duké fó prioridade ba hasa'e produsaun hahán báziku hanesan etu, batar no ai-farina (staples), di'ak liu fokus ba hahán ne'ebé iha nutrisaun mikro sira, vitamina no proteína barak atu hadi'ak nutrisaun no hasa'e rendimentu ba produtor sira.

### 6. Peskiza hatudu katak só parte ki'ik de'it husi produtor mak uza input, ho sujetau posivel katak presiza hasa'e asesu ba input no dezenvolve merkadu ba input sira.

Ami hanoin katak di'ak liu promove modelu dezenvolvimentu agrícola ne'ebé la presiza input barak atu la aumenta kustu produsaun ba to'os nain sira. Di'ak liu suporta produtor sira atu sira bele prodús rasik sira nia fini lokál, adubu no pestisida organiku, nsst. Peskiza ne'ebé suporta husi UNICEF hatudu katak presu input fó impaktu boot (shock) ba umakain, boot liu duké redusaun rendimentu. Entaun di'ak liu la kria dependénsia ba input.